

甲乙之際宮閨錄

第二冊

清副貢丁君闇公墓誌銘

閩縣陳寶琛撰并書

宣統二年 朝廷召試舉貢丹徒丁君闇公以江蘇首選上計及禮部試報罷士論惜之予方長禮學館薦爲纂修禮藁多待君而定國變後君司江南軍府記室歲丁巳復來京師與予過從加密及予扈行朝之三載君亦移家天津遊燕文談無異都下閱兩歲君遽以微疾卒君叔祖濂甫先生與吾祖同鄉舉又予鄉舉座師君父教授公本生父詹事公世父京兆公均與予同鄉舉而予與詹事又同捷南宮且同門焉君言止端和學誦淵茂雅有先世遺風尤精貫乙部之學纂述至老不倦所爲詩文贍華典切於剝復之交辭義能持體要長慶古風四六文最爲世所稱誦君旣自傷不遇益於世寡合顧獨與予親予自還朝以來疇昔知交凋零已盡

而所識世家後進學行不失先輩矩度如君者殆未獲其匹
不圖閔默餘生反而哭君追懷累世交親比年蹤跡蓋不勝
悽愴悲恫也君諱傳靖字秀甫光緒丁酉副貢同治庚午四
月二十日巳時生後庚午九月初十日午時卒配劉孺人先
君十四年卒君不再娶自號招隱行脚僧京口招隱寺側有
君自卜之葬地子三沂淇瑗孫五永森永齡永選永道永邁
能世其家今諸子將歸櫬與孺人合窆屢來乞銘銘曰

京江丁氏澤未替三世及君慳一第蔚然文學軼先世嚬立
衰季行有制豐髯溢尺色常霽窮老賴此忘年契大劫方急
君遽蛻羈孤失朋牘酸涕迸哀納詩幽室閉子孫秀發儻能
繼

甲乙之際宮閨錄卷四

丹徒丁傳靖閨公輯

貞烈一

北都

永康侯夫人

永康侯徐錫胤夫人朱氏成國公朱純臣女年十七而寡無子錫胤庶伯錫其爵夫人屏鉛華坐卧一樓讀書學書法善彈琴每夜闔戶焚香獨奏商調激楚聞者悲之事姑孝謹姑憐之時與同卧起甲申三月十九日都城破家人聞難驚避去保姆曰夫人避夫人笑曰我何避保姆曰夫人卽死如太夫人何太夫人曰吾婦且不避吾何避於是皆不避夫人奉廟主至中堂積薪於庭再拜太夫人曰請與姑侍廟主同燼太夫人曰諾乃命取命服漬油服之太夫人西嚮坐夫人東

向侍命舉火火舉太夫人倉皇欲避不得出繞屋而號夫人
堅立不動頃之逮乎火而死夫人有侍婢四皆聰慧教之習
彈琴甚愛之夫人將火揮之去曰若毋火四婢泣曰夫人死
婢子焉避請皆火火發烈焰蔽庭忽一婢若有物挈之出擲
鄰屋瓦上膚髮皆焦灼半日甦方避去事定始出見故人爲
流涕述其事如此

居業堂集參明史稿

按明史表永康侯徐錫印當是避諱改胤爲允或改印也
徐應垣崇禎三年襲錫允爵至甲申三月則襲爵者名錫
登死於賊

楊士聰親屬

寇陷京師士聰投愛女於井趨孔夫人與妾楊氏祝氏縊已
則仰藥自殺爲防守者覺以水灌之大吐復活妻孔氏懸絕

而聽二妾與女死焉得間南奔

梅村文集

人至投愛女於井趨妻妾懸梁則死志堅矣不幸爲人救
不得與十九忠臣并驂天上然後知作忠臣亦須有福至
已死之女及妾則固明明殉國當與正祀諸忠婦女等量
齊觀也

史可程妻及子婦

陳其年哭史懷永詩注懷永名貽遽庵長子懷永母夫人及
婦蕭氏甲申殉節長溝

湖海樓集

遽庵可程字

梁烈婦

烈婦梁氏真定人都諫素洲公女郕延兵憲王公原撫配也
甲申賊破都城烈婦與小姑慶毀容深藏乃不爲賊窺及賊
遁祖姑許淑人曰賊遁矣我輩不乘此還鄉里將何御遂攜

以行踰跟至彰義門見婦女有爲賊驅以行者有與賊並行者有騎而歌笑自若者烈婦曰夫非良家婦歟何恬不知恥若此儻吾爲所掠有死而已然死於道路何如死於此地之爲愈也許淑人曰吾尾賊行賊不反顧婦曰若反顧奈何語慶曰我死姑能從乎慶曰願從嫂死烈婦意遂決視道旁有井烈婦曰清泉皓潔吾與小姑得死所矣遂攜以投井

夏參政親屬

夏口口繼室趙孺人口口官福建參政留家京師城破謂諸子曰國家大變至此汝父在閩我身爲命婦惟死爲得全耳先麾其女入井然後偕季媳孀婦唐氏同縊死僕婦王氏亦隨死

忠貞軼紀

按忠貞軼紀僅見近時活字板本夏字下缺名考崇禎十

五年搢紳福建糧道夏尙綱順天籍宜興人或卽此人

王世德妻

魏恭人南昌人歸錦衣衛僉事王世德世德前妻生子潔及女一僉事嘗夢再娶婦容貌厯厯竟以恭人繼恭人課子潔讀書僉事指恭人謂潔曰阿母故是我夢中人也李自成圍京師急僉事出巡北城恭人匿前室女他所抱已女及姪女媵婢十七人環井以待久之家奴走告賊入恭人仰天大哭擲懷內女於井家人以次下哭聲撼牆壁恭人整衣振袂右手持姪女踴起呼天投井死

魏叔子文集

按此卽王崑繩源之前母僉事三娶於蕭生源蕭亦賢婦魏叔子有傳

查氏七烈

江西撫州查國英妻周氏宛平人寡居京師依夫弟國才以居京師破周立志死國才妻張氏曰早有此志以未得姆言尙逡巡耳甯畏死乎國英女二姑國才女三姑四姑又國才妹嫁黃氏率其女適在家及國才妾廉氏廉之母廉媼皆從容前日太君就義某等相從地下耳周氏笑曰我查氏不亡矣拜手中堂引繩於室弱女爭先周氏笑曰理當吾先耳遂投繯復甦曰死甚易勿畏遂以次就縊死二繩忽絕廉氏及國才幼女復甦廉氏後爲尼

甲申小紀 周太君孫曰
乾日乾子爲仁爲義爲禮

張烈祖母

生員張烈祖母崔氏撫孤守節四十年子希吳孫烈俱有名庠序賊破城烈痛心發憤日往伏帝屍哭賊怒拘之令作文題爲天與之烈破日無可奈何賊大笑崔欣然曰孫得死所

吾之願也後賊入其室崔高坐罵之家人恐跪而爲之請賊以爲老諄竟舍之去賊既退崔呼家人曰吾平日教若輩云何而向賊作如此面目怒不食死

忠貞戰紀

搖烈孝

搖氏女小名全哥蕭山人父士忠官參將女美姿容寡言笑女紅精好尤知大體及笄未字人甲申三月京師陷有僞權將軍欲納女女瞠目大吼曰頭可斷身不可辱也賊不聽乃刑辱其父母弟妹必欲得女方已女大哭曰女生不能孝侍父母友愛弟妹今因女一人而斬搖氏之祀女罪愈深奮身觸柱欲死爲眾抱持女慟哭絕粒賊怒甚愈加凌虐囚其父求死不得一日乘間同父及母鮑氏暨弟妹等俱縊死賊歸見女顏色不變恨其生不從己欲污其屍屍忽動賊驚避尋

知女實未死喜甚復好言求合女佯許之曰若殯葬我父母弟妹方從爾不然我卽刎死賊信其言乃厚葬之事畢女持刀哭罵將自刎賊大怒奪刀亂刺頃刻而死

北略

吳烈婦

京師長班吳奎妻張氏德色皆備家雖貧屋宇甚潔賊至欲主其家婦伏宅後水內賊去乃歸尋夫一賊已據其室矣猝見婦美強污之比賊睡熟婦漸聞叩門聲知其夫至乃潛啟門迎入以刀刺賊死取其財物而逃道旁有井婦泣曰烈女不更二夫昨之偷生不死者慮君飢寒失所耳今旣獲一面又有所得死甘心矣奎力阻之婦曰君卽不罪妾何面目偷生於世乎竟投井死

北略

王自超妻

王自超會稽人癸未庶吉士妻祝孝廉女自超降賊後祝髮某地久之夜歸婦聞叩門聲問何人自超曰予也妻曰汝何人自超曰豈我音而不辨乎妻曰固也第汝受朝廷厚恩而不思報反降賊子大誤矣旣已祝髮亦休矣今猶趨歸又誤也歸而叩予戶更誤也汝不過思兩子耳汝急去勿相見也竟不啟納自超慙而去祝氏嚴督其子讀書悉能文不令應試祝亦奇女子也

北略

楊掌科妻

朱永慶字長源以字行大興諸生父宣府巡撫之馮乙酉夏江夏郡縣推長源起兵事敗被執隸正黃旗僦居宣府人美納吾家長源修髯倜儻多氣節性佞佛嘗搭七條戒衣人目之爲三教總持烏金王聞而賢之賜以婦人輒不受學科楊

某死於難夫人華氏墮德姬院王嘗以賜人夫人薙髮以拒或以告長源長源領之王既賢長源滋欲賜以婦遣入德姬院恣所擇長源既聞楊夫人墮是院也遂弗辭見裏佛巾者知爲楊夫人大言曰予大興故殉難巡撫朱之馮子也熟視而自引其服口若道裝予亦道裝大興達毘陵易耳毘陵者夫人故里也

按大興達毘陵不可謂易據題名碑朱之馮此大興籍而實徐州人此大興或徐州之訛

言略動之夫人知其非常人欲資以上掌科墓也亦弗辭長源以夫人歸納吾家向夕夫人叩長源曰君脫難人於厄哀難人否長源曰爲全夫人節非特哀之而已是時納吾伏童奴數輩偵兩人而長源據椅誦經燭且燼聲益高至曉聲不輟童奴報納吾納吾異之抵夜復令童奴偵之誦如初三夕伺之又如初納吾晨興盥洗更衣候門啟抱長源足叩頭呼

活佛徐曰君既不近婦人何贅疣此一愛爲長源曰此措紳婦吾欲完若璧以歸恐機洩不果吾願故且同室非誦佛無以明心不意爲君偵得幸爲我諱毋敗機事也納吾曰君誼動鬼神毋復夕夕苦乃爲治別室遣老姬侍楊夫人奉兩人如佛矣久之聞於王王愈賢之召長源曰公誠異人吾爲公合浮屠尖趨長源令夫人具書達毘陵以其母與弟來王資送之還平江夫人歸逾年長源亦微疾跣跌而化順治丁亥秋也

史外

潘鵬妻妾

潘鵬家巨富開生藥坊妻徐氏宛平孝廉女妾楊氏臨清妓俱美麗每花晨月夕楊氏撥冰弦令人神情飛舞京城陷鵬對二人大哭徐曰賊兵姦淫日甚我等有死而已卽取砒霜

入酒與楊約曰事急與子偕飲忽兩賊至鵬匿天花板上賊見二女美宛轉求歡徐取酒置几上賊喜斟酒勸徐立飲而盡面赤身倒楊曰彼素量窄賊復勸楊楊曰天性不飲若將軍有意請滿飲此杯大觥勸賊賊見壁間琵琶問楊能彈否楊卽彈以侑酒二賊大悅把酒暢飲須臾毒發腸痛流血死鵬急躍下以羊血灌徐得甦徐曰均爲毒酒我得不死意者其天乎鵬曰固也然亦砒性重下沉汝先飲且少更得羊血解之是以無恙若二賊則天促其亡非由人巧也因集珍寶僞作男飾他避後吳三桂兵至始遁出京師

北略

李本妻

段氏懷遠人生員李本妻也甲申亂兵入懷城段氏避居南安賊迫上馬誓死不從痛罵賊舉刃裂腦立斃刃下尙罵不

絕口 三垣筆記

貞烈二 南都

顧亭林母

王貞女崑山人太僕寺卿字孫女諸生述女字侍郎顧章志
孫同吉未幾同吉卒女卽去飾白衣至父母前不言亦不泣
若促駕行者父母有難色遣使告其舅姑舅姑婦庭內待之
女旣至拜柩而不哭斂容見舅姑姑含淚曰兒不幸早亡奈
何累新婦女聞姑稱新婦淚簌簌下遂留執婦道不去早晚
跪奠柩前視姑眠食外輒自屏一室雖至戚遣女奴候視皆
謝絕曰吾義不見門外人後姑病女服勤晝夜不懈及病劇
女入候牀前出視藥竈往來再三若有所爲者羣婢窺之莫
得其迹姑旣進藥睡覺而病立間呼女日向飲我者何藥乃

速愈如是欲執其手勞之女縮手有難進狀姑怪之起視已斷一指矣姑歎曰吾以天奪吾子常憂老無所倚今婦不惜殘支體以療吾疾豈不勝有子也流涕久之人皆稱貞孝云

史明

按亭林年譜貞孝入顧氏守節時年十六明史此傳卽亭林行狀原稿敘貞女入門情事字字得體尋常敘述貞女守節多作哀痛呼搶語讀此自悟其非惟不及後來殉國事殆有所避忌然明季諸忠殉國史皆據事直書何獨於此而諱之此史家之疏也補其事於後

王氏守節撫嗣子炎武晝紡緝夜讀通鑑史記本朝政紀諸書炎武六歲授之大學稍長輒舉劉文成方忠烈于忠肅事教之崇禎甲戌巡按御史邢彪佳表其門曰貞孝丙子朝命